



Broj: K-II-02/06

Sarajevo, 8. februara 2006. godine

### SAOPŠTENJE ZA JAVNOST

Komisija za ljudska prava pri Ustavnom sudu Bosne i Hercegovine (u daljnjem tekstu: Komisija) održala je od 6-8. februara 2006. godine svoju 2. sjednicu u 2006. godini, na kojoj je razmatrala 248 individualnih prijava, u kojima se tvrdi povreda ljudskih prava i temeljnih sloboda, zagarantovanih Aneksom 6. Općeg okvirnog sporazuma za mir u Bosni i Hercegovini.

Komisija je u više individualnih ili grupnih odluka utvrdila povrede ljudskih prava i sloboda podnosilaca prijava.

Između ostalih, Komisija je za 16 odluka o prihvatljivosti i meritumu, koje je usvojila u vezi „stare devizne štednje“ u periodu od aprila 2005. do januara 2006. godine, usvojila tzv. Odluku o daljnjim pravnim lijekovima, kojom je za ovih 16 odluka obavezala Bosnu i Hercegovinu da preduzme određene radnje u vezi „stare devizne štednje“, dok je oslobodila prvobitno obavezanu Federaciju Bosne i Hercegovine. Ova Odluka o daljnjim pravnim lijekovima donesena je na zahtjev OHR-a za revizijom implementacije navedenih 16 odluka o prihvatljivosti i meritumu, uzimajući u obzir odluku Ustavnog suda Bosne i Hercegovine, broj *U 14/05*, kojom su stavljene van snage relevantne odredbe Zakona o utvrđivanju i načinu izmirenja unutrašnjih obaveza F BiH koje se tiču „stare devizne štednje“. Prema tome, ne F BiH, već Država ima obavezu da implementira navedene odluke, na način kako je to utvrđeno Odlukom o daljnjim pravnim lijekovima.

Osim toga, Komisija je usvojila Rješenje o neprovođenju odluke, u predmetu *CH/03/14688, Abid i Silvana Osmanović protiv Bosne i Hercegovine i Federacije Bosne i Hercegovine*, od 8. septembra 2004. godine, a koja se tiče izmještanja djece iz bivšeg Dječijeg doma „Ljubica Ivezić“. Komisija je zaključila da Bosna i Hercegovine nije implementirala zaključke br. 4, 5, 6. i 10. ove Odluke. Ovi zaključci su glasili:

4. jednoglasno, da naredi Bosni i Hercegovini da odmah i bez daljeg odlaganja osigura podnosiocima prijava informacije o tome gdje se njihova djeca nalaze, o njihovoj situaciji, kao i sadašnjem pravnom statusu u Italiji;

5. jednoglasno, da naredi Bosni i Hercegovini da preduzme sve neophodne korake da olakša pripremne kontakte između podnosilaca prijava i njihove djece, uključujući, ukoliko je potrebno, angažovanje iskusnog socijalnog radnika i psihologa koji bi olakšali ponovno eventualno uspostavljanje kontakta između podnosilaca prijava i njihove djece. Ovi pripremni kontakti bi trebali započeti u roku od mjesec dana od datuma prijema ove odluke;

6. jednoglasno, da naredi Bosni i Hercegovini da preduzme sve neophodne korake da omogući susret podnosilaca prijava sa njihovom djecom, na prikladnoj lokaciji u Italiji, uključujući pokrivanje troškova puta podnosilaca prijava u Italiju. U slučaju R.S., obzirom da informacije dostavljene Komisiji ukazuju da je on u nekoj instituciji, gosp. i gđi Osmanović bi također trebalo omogućiti susret sa osobama odgovornim za staranje o njemu. Susret između podnosilaca prijava i njihove djece bi trebao biti organizovan nakon pripremnih kontakata naređenih u prethodnoj tački, a u skladu sa željama svih zainteresiranih strana (podnosilaca prijava i njihove djece), najkasnije u roku od dva mjeseca od datuma prijema ove odluke;

[...]

10. jednoglasno, da naredi Bosni i Hercegovini da izvijesti Komisiju ili njenog pravnog sljednika, u roku od šest mjeseci od datuma prijema ove odluke, o koracima koje je preduzela da izvrši gore navedene naredbe.

U skladu sa Pravilima procedure Komisije, usvojeno rješenje se dostavlja javnom tužiocu na daljnji postupak, kao i stranama u postupku.

Nakon sjednice Komisije, u prostorijama Ustavnog suda Bosne i Hercegovine, održana je godišnja konferencija za štampu Komisije i Ustavnog suda Bosne i Hercegovine. Između ostalih, predsjednici i registrari ove dvije institucije izvjestili su prisutne novinare o izuzetno pozitivnim rezultatima postignutim u 2005. godini.

Što se tiče Komisije, naglašeno je da je u 2005. godini riješeno 3001 predmet, od kojih je 1401 u meritumu! Uporedbe radi, bivši Dom za ljudska prava je za period od 1996-2003. godine usvojio ukupno 636 odluka o prihvatljivosti i meritumu, što dovoljno govori o postignutim rezultatima.

Konačno, naglašeno je da Komisija očekuje da će u toku ove godine riješiti i preostalih ca. 2600 predmeta, koje je naslijedila od bivšeg Doma za ljudska prava.

Registar Komisije za ljudska prava pri  
Ustavnom sudu Bosne i Hercegovine,  
dr iur. Nedim Ademović